



KOMUNIKADO PA PRENSA

Fecha
6 ougùstùs 2012

Account Manager
Jhanirha Anita

Email
Jhanirha.anita@gobiernu.cw

Nr.

Splikashon di trabounan ku ta tumando lugá riba GOUVERNEUR VAN LANSBERGEWEG i ROSENDAALWEG

Willemstad – Servisio pa Obra Públiko (OW) pa medio di e komunikado aki ta reakshoná riba puntonan di preokupashon di habitantenan ku nos a risibí i ta duna un splikashon riba e situashon di trabounan di infrastruktura na altura di Gouverneur van Lansbergeweg i Roosendaalweg.

Ta trata di e proyekto “Seguridat rondó di skolnan fase 4”. E proyekto aki ta den ehekushon den bisindario di Maria Immaculata Lyceum i Maria College na Gouverneur van Lansbergeweg. A introdusí kambionan bastante supstansial kaminda a traha alsera, pone drèmpel dilanti di e skolnan, i a bini un separashon físiko riba e kaminda di Gouverneur van Lansbergeweg pa yuda baha e velocidat.

Tambe lo drecha e desagüe riba Gouverneur van Lansbergeweg i Roosendaalweg, miéntras ku riba un parti di Roosendaalweg lo drecha e fundeshi di e kaminda i pone un kapa di asfalt nobo. Por último lo pone iluminashon públiko den tur dos kaya.

A kuminsá ku e proyekto na yüli 2011 i e intenshon tabata pa konkluí esaki den un periodo di seis luna. Debí na diferente faktor i sirkunstansia e kontratista no a logra konkluí e proyekto ainda.

Relashoná ku e reklamonan risibí nos a dialogá den pasado na vários okashon ku e habitantenan palabra ku lo hasi un adaptashon na e diseño pa por fasilitá entrada pa su kura di kas. Nos ke duna un splikashon tékniko di e forma ku a yega na un disenjo pa e lugánan di parker den Roosendaalweg. Mester a adaptá e infrastruktura di Gouverneur van Lansbergeweg i Roosendaalweg por alsa e seguridat di tráfiko pa e usuarionan den bisindario di e skolnan.

Saliendo for di e punto di bista di seguridat, no por a mantené e situashon eksistente di Roosendaalweg na altura di kasnan 12 te ku 14 i Gouv. Van Lansbergeweg 27. Na e puntonan aki e kaya, inkluyendo e alsera, tabatin un hanchura di 10 meter. Práktika a demostrá ku mas hanchu e kaminda ta, mas haltu e velocidat tambe ta. Pa e motibu aki a skohe pa hasi un otro repartishon di espasio esta 3 meter pa e alsera, 5 meter pa e kaminda i 2 meter pa habitantenan por parker outo dilanti nan kas.

Na e banda di Roosendaalweg 13 te ku 15, e kaminda su estado ta bon ainda i lo no kambia esaki. Na e banda aki a opta pa pone e lugánan di parker enfrente di e



KOMUNIKADO PA PRENSA

<i>Fecha</i>	<i>Account Manager</i>	<i>Email</i>	<i>Nr.</i>
6 ougùstùs 2012	Jhanirha Anita	Jhanirha.anita@gobiernu.cw	

kasnan i mantené e liña di betòn “lageband” eksistente. E “lageband” aki ta indiká komienso di e alsera.

Servisio pa Obra Públiko semper a bishita habitantenan i ta trata na atendé pregunta i remarkenan na e manera mas diligente posibel. Na momento ku e trabounan dilanti di Gouverneur van Lansbergeweg 31 a kuminsá habitante di e kas a duna di konosé ku e no ke e pòpchinan di betòn “bollards” dilanti di su porta di kas. Relashoná ku esaki a splika e habitante ku e alsera na altura di su kas no ta haltu debí ku awa di su kura di kas mester por sali sin opstákulo. Tambe nos a duna di konosé ku si no pone esakinan, outo lo bai parker einan i e peaton lo mester kana riba kaminda.

Durante un kombersashon a disidí ku, pa e habitante por drenta su kura di kas na e parti di Roosendaalweg ku mas fasilidat, lo kita un di e pòpchinan i skùif un otro, asina tòg pa e método ta efektivu pa su propósito. Pa loke ta e asunto ku trùknan di chupa berpùt no por drenta su kura, a duna komo alternativa ku e trùk por para den e lugá di parker dilanti su kas i usa e pipa.

Por último nos ke duna un splikashon tambe pa ku e lugánan di parker den Gouverneur van Lansbergeweg. E hanchura di e kaminda eksistente, di kura pa kura, na altura di Gouv. Van Lansbergeweg 31 tabata 15 meter. Konsekuentemente outomobilistanan tabata kore ku velocidat bastante haltu, i dor ku e alsera tabata plat tabata us'é komo lugá di parker outo i peatonnan mester a kana riba kaminda. A base di esaki e espasio a haña un repartishon nobo, kaminda e situashon di tráfiko ta bira mas sigur pa un i tur.

Nos ta pidi nos diskulpa pa e inkumbinensia ku e situashon ta kousa. Nos lo sigui hasi nos máksimo esfuerso pa brinda pueblo di Kòrsou un bon servisio ora ku ta trata mehorashon di nos infrastruktura. Esaki manera semper lo sosodé den koperashon estrecho ku habitantenan di e área konserní.




KOMUNIKADO PA PRENSA

Fecha
6 ougùstùs 2012

Account Manager
Jhanirha Anita

Email
Jhanirha.anita@gobiernu.cw

Nr.



Situashon di Gouverneur van Lansbergeweg i Roosendaalweg